

ESPERANTO



EN AFRIKO

Oficiala bulteno de la Afrika Komisiono de UEA

Numero 37 (2018: 4)



Karaj legantoj, karaj aktivuloj en Afriko, Certe multaj el vi scias, ke mi kunlaboras de antaŭ iom da tempo kun la Afrika Komisiono de UEA kaj interalie kunredaktis la bultenon kun Adjévi A.

Nu, ekde la nuna numero mi iom pli memstare redaktos la informilon (kompreneble Adjévi plu restas tre proksime kaj helpas). Same, ne mankas rekomendoj kaj konsiloj de la aliaj membroj de la Afrika Komisiono.

Mi devas verki pri miaj unuaj impresoj, pri la afrika movado, pri tio, kion mi spertas, kio malsimilas al la situacio, kiu estas en mia lando (eĉ en mia kontinento), ĉar jes, mi ne estas afrikano, kvankam miaj kulturo, tradicio kaj praaĵoj estis afrikdevenaj. Kompreneble giganta parto el tiu kulturo restis en mia lando kaj sento je proksimeco, tiu zamenhofa "... sed fratoj kun fratoj" eĉ pli fortas ĉe mi!

La ekzisto de oceano inter niaj du kontinentoj fakte ne estas problemo. Male, laŭ miaj spertoj pliaj fortoj por pli solida afrika movado ĉiam estas bezonataj, necesaj kaj bonvenaj eĉ el mia fora kuba karibia insulo.

Kunlabori pli diligente kun afrikanoj lastatempe malfermis novajn perspektivojn al mi. Tio montris al mi la potencialojn de la afrika movado. La celoj de UEA kaj de la kontinenta komisiono estas disvastigi Esperanton por antaŭenigi ankaŭ la kontinenton!

Estas honoro kaj defio por mi transpreni la redaktadon kaj fakte mem verki parton de la afrika bulteno. Daŭrigi la laboron de Adjévi estas malfacila tasko ĉar lia senĉesa laboro dum tiom da jaroj favore al Esperanto estas malfacile superebla. Tamen mi ne laboras sola: krom la membroj de la Afrika Komisiono, multaj aliaj helpas, inkluzive aktivulojn, kaj agantojn en lokaj kluboj.

Multas la laboro. Tial mi invitas vin senhezite kontribui al ĝi, i.a. per la legado de la bulteno, sendo de fotoj, desegnaĵoj, verkado de artikoloj, propono de rubrikoj, strategioj kaj projektoj al la retadresoj en la kolofono.

La gvidlinio de la bulteno ne ŝanĝiĝis, sed mi iom post iom klopodos porti iom pli da novaĵoj pri la lokaj kaj landaj agadoj. Ĉar dezajnado estas parto de mia kutima laboro por Esperanto, mi do iom post iom ankaŭ montros pri tio en la informilo. Cetere mia plej granda intereso estas pli kaj pli krei retan kaj ciferecan bultenon.

Mi vidas tre aktivan afrikan movadon en la reto, amaso da afrikanoj estas ĉiutage en sociaj retoj, blogoj, diskutlistoj k.s. Ili uzas Esperanton tie.

Unu rekomendo de membroj de la Afrika Komisiono estas kontakti ilin en la reto, ĉar tie estas pli kaj pli vere aktiva komunumo.

Indus ankaŭ eluzi la eblojn en la reto, kiel ekz. la servoj "eventoj.hu", "eventaservo.org", por registri kaj afiŝi aranĝojn en Afriko, kie regule okazas eventoj!

La afrika agado estas giganta kaj la organo de UEA regule informas en sia rubriko "Afriko brilas" pri parto de ĝi. Unu el miaj dekomencaj ideoj estis konatiĝi kun la aktivuloj, kiuj svarmas en la kontinento. Mi skribis al iamaj verkemuloj kaj kontribuantoj. Aperis informoj pri mi en la antaŭa bulteno, en la afrikaj diskutlisto kaj Facebook-grupo. Tio multe helpis.

Trovi kunlaborantojn ĉiam estas malfacila tasko... sed ili ja havas ŝlosilan rolon en la plua vivado de la bulteno, ĉar ili nutras la revuon per siaj kontribuadoj. Kiu povas nun kunlabori? Temas pri tikla demando, sed povas kunlabori per verkaĵoj al la bulteno ĉiu e-isto (afrika aŭ ne), kiu favoras la antaŭenigon de Esperanto en la kontinento. Gravus la informfluo en kaj ekster Afriko, por ke aliaj esperantistoj estu akurate informitaj pri la movoj en unuopaj landoj.

Necesas unuecigi la agadojn, movi la movadon ĉiam antaŭen, kunlabori, sekvi la komunajn celojn de la kontinenta komisiono kaj UEA. Alivorte, necesas plibonigi kaj profesiigi nian laboron.

Tiu ĉi bulteno donas al vi la eblon diskonigi viajn lokajn aktivaĵojn kaj kunlabori por la komunaj celoj en Esperantujo. Ĉu vi sentas vin parto de tiu Esperantujo? Se jes, jam estas la tempo labori kun ni.

Dankon al ĉiuj, kiuj malgraŭ malfacilaĵoj plu laboras por Esperanto! Ne ĉiam facilas volontule labori por iu idealo, sed valoras la penon tion fari por nia kara afero! Ĉiaj kontribuadoj – ĉu retmesaĝe aŭ paperforme – ĉiam plu haveblas ĉe la redakcio.

Eblas trovi ankaŭ informojn pri afrika agado en Youtube, blogoj, retpaĝoj kaj sociaj retoj. Io tia estas bona ĉar tiuj aktivaĵoj kontribuas al la tradicio kaj certigas la pluan ekzistadon de Esperanto en la kontinento! Mi mem eluzas la fakton ke la bulteno aperas bitforme por aldoni de tempo al tempo ligilojn kaj utilajn retajn informojn en ĝi. Mi eĉ instigas vin – verkemulojn kaj kontribuantojn – tiajn eblojn plu uzi en viaj kontribuadoj.

Informoj pri gravaj kaj aktualaj temoj kiel la kurso de la konata E-intruisto Dennis Keefe pere de la Unesko-Kuriero, doktoriĝa disertacio de D-ro Byelongo

Elisee Isheloke el Sud-Afriko pri BRICS-landoj kaj Esperanto kaj kiel la Tago de Zamenhof ne povis aperi en tiu ĉi numero. Bv. ne timi, tiuj materialoj aperos en la venonta numero de la informilo.

Dume, kun plezuro mi informas vin ĉi-numere pri la unua Afrika Kongreso de Virinoj (AKVo) en Madagaskaro. Tiu renkontiĝo donis viglan impreson ĉe pluraj geesperantistoj, pacifistoj kaj feministoj. Plurloke en la reto oni legas eĉ kritikajn komentojn tiurilatajn. Kaj kion mi persone plej ŝatis ĉe partoprenantoj kaj organizantoj de tiu evento, estas ke malgraŭ la raporto aperinta en la novembra revuo Esperanto ili ne forgesis ankaŭ verki artikolojn por la bulteno. Alvenis ĉe la redakcio eĉ pluraj diversstilaj raportoj pri la 1-a AKVo. Ni daŭrigu kun la sama spirito: ĉiam ne preterlasi la okazon informi pri niaj agadoj, kundiĉi niajn spertojn kaj kuraĝigi unu la aliajn en la kolumnoj de la informilo.

La jaro 2019 baldaŭ alvenos ĉe ni. Mi tre ŝatus plu aktivi en la nova jaro kaj en la jaroj poste. Espereble, saman deziron ankaŭ vi nutras. Feliĉan novan jaron 2019 al vi!

Javier Ramos Nistal

Afrika movado en la reto

 ASUT - Afrikanoj Sub Unu Tegmento
<https://www.messenger.com/t/449510291925708>



 <https://www.facebook.com/groups/126175590744112>
<https://www.facebook.com/oficialabulteno>

 **Komunik-listo:**
<https://groups.yahoo.com/neo/groups/afriko>

Retpaĝoj:
<https://www.esperanto-afriko.org>
https://uea.org/asocio/komisionoj/afrika_agado

Elŝutejoj:
<https://www.esperanto-afriko.org/bultenoj.htm>
https://uea.org/vikio/Bultenoj_Esperanto_en_Afriko



1-a Kongreso de virinoj

La unua Afrika Kongreso de Virinoj (AKVo) okazis en Moramanga, Madagaskaro, sub la aranĝo de la Esperantista Virina Asocio en Afriko (EVAA), de la 21-a ĝis la 27-a de septembro 2018.

El la 26 partoprenantoj estis nur unu eksterlandano, nome Joel Muhire el DR Kongo. S-ino Alexandrine Omba Tshamena, la iniciatinto de AKVo, fine ne partoprenis la renkontiĝon. Ĉion surloke sola devis prizorgi ŝia koleginino kaj kuniniciatinto de EVAA Miora Rasohari-naivo.

Krom tio, la kongreso finiĝis la 27-an de septembro, t.e. unu tago pli frue ol la anoncita dato.

Adjévi Adjé

Vortoj de Alexandrine O.

Saluton, gesamideanoj!

De la 21-a ĝis la 28-a de septembro 2018 okazis la 1-a Afrika Kongreso de Virinoj en la urbo Moramanga, Madagaskaro.

Vere E-Virinoj en Afriko havas celon, valorigi nian E-movadon en Afriko.

Ni multe cerbumis pri nia movado kaj trovis bone unue starigi nian asocion por ekflugi bone, sed bedaŭrinde ne sukcesis starigi nian asocion ĉi-jare ĉar la unua paŝo ĉiam estas mal-facila. Dum nia dua AKVo, ĉio estos en ordo.

Mi ne povas fini tion ĉi sen danki al ĉiuj, kiuj kontribuis finance por la sukceso de tiu iniciato kaj aparte al niaj koreaj samideanoj, kiuj helpis por nia sukceso kaj ankaŭ al niaj samideanoj en Kongo, Benino kaj Litovio.

Alexandrine Omba Tshamena
(Kinŝaso, DR Kongo)



Alexandrine O. T.

Rakonto de partopreninto de la 1-a virina kongreso

En Moramanga, gastama urbo de la solstara afrika insulo Madagaskaro, okazis la 1-a Afrika Kongreso de Virinoj (AKVo) de la 21-a ĝis la 28-a de septembro 2018. La kongreson organizis la E-ista Virina Asocio en Afriko (EVAA) kun 25 partoprenantoj el diversaj landpartoj de Madagaskaro kaj unu el DR Kongo.

La 21-a de septembro estis la alvena tago!

La malfermo okazis la 22-an de septembro, Pastorino Miora Raveloharison bonvenigis ĉiujn per kuna kantigo de la himno *la Espero* kaj laŭtleĝo de la salutmesaĝo de la prezidantino de EVAA, s-ino Alexandrine Omba. Sekvis laŭvice salutoj de diversregionaj reprezentantoj el Madagaskaro kaj DR Kongo. Pastorino Miora Raveloharison poste gajmiene deklaris la 1-an Afrikan Kongreson de Virinoj malfermita!

La kongresa temo: *Esperantistinoj leviĝu por la paco, starigo de EVAA* estis trafe elektita. Estas konate, ke multaj afrikaj landoj dronas en marojn de ĉiaspecaj perfortaĵoj delonge; ekz. milito, rabkaptado, amasbuĉado, rasapartigo k.s.; kaj ĉio tio prezentas malbonajn postefikojn en la vivo de afrikanoj. Por elturniĝi, necesas, ke ĉiu afrikano sentu sin homo konscienc-hava pri ĉio bona por la plibonigo de la mondo.

La pasintjare starigita asocio EVAA per sia kongreso elpaŝis publike kaj alvokas ĉiujn al kuna eltrovo de ĝusta vojo al konstruado de paco helpe de Esperanto, porpaca lingvo.

Joe Mo (Joel Muhire) en siaj kantoj admonis, ke viroj kaj virinoj estas la ĉefaj vojmontrantoj por la infanoj kaj ke iliaj kondutoj devas esti bonaj kaj imitindaj. Krom Joe Mo, la kongresanojn plezurigis ankaŭ grupo de lertaj dancistoj sub la gvido de la e-istino Fafa kaj la malgaslingva kantado de la 5-jaraĝa knabo Jonathan, filo de Pastorino Miora Raveloharison.

Dumkongrese, ni ekskursis al la muzeo de la Nacia Ĝendarmejo de Moramanga, fondita en la jaro 1963 kaj inaŭgurita en 1967, kaj povis konatiĝi kun historiaĵoj de Madagaskaro. Krome, okazis du tuttagaj ekskursoj al la ercekstraktejo de nikelo kaj kobalto, administrata de la ercagentejo Ambatovy, kaj al la Nacia Parko de Andasibe, riĉa je lemuroj. Post la ena vizito de la parko, ni ĝuis freŝan aeron en bela apudparka ĝardeno, ludis, kantis kaj eĉ tag-manĝis tie.

Okazis ankaŭ prelegoj dum AKVo. S-ino Lala el Antananarivo prelegis pri la ĝenerala stato de la movado en Madagaskaro, s-ino Fafa pri Madagaskaro, ĝiaj kulturo kaj popolo. Ŝi substrekis, ke Madagaskaro estas loĝata de popolo, kies prapatroj devenis el Azio, la Afrika bloko kaj Eŭropo — kaj tial iliaj fizikaj trajtoj tre similas al tiuj de sudazianoj. Joel Muhire siavice prelegis pri la movado en DR Kongo.

En la kongreso partoprenis lernantinoj de la *Gazela E-centro*. Joel Muhire al ili lecionumis pri kelkaj E-gramatikaĵoj kaj ankaŭ profitis la okazon lerneti la malagasan lingvon de tiuj lernantinoj. En lega konkurso partoprenis 9 gekomencantoj, kies lega nivelo estas admiringe bona, tamen nur la tri unuaj devis ricevi premiojn, konsistantajn el la revuo *Juna Amiko* kaj la muzika albumo *Esperanto, ilo de paco* de Joe Mo.

Dum la fermo, 2 lernantinoj, Olivia kaj Lanto, esprimis sian ĝojon ĝui la renkontiĝon kaj dankis s-ron Joel Muhire pro lia helpo dum la tuta kongresa semajno kaj bondeziris al li bonan revenvojaĝon al DR Kongo. Post la dankaj kaj adiaŭaj vortoj de Joel Muhire, Pastorino Miora



Joel M. kun kelkaj kongresaninoj



Raveloharison gratulis ĉiujn kaj deklaris la kongreson fermita.

Tuj jen ni ĉetabliĝis por lastfoja kunmaĝado kaj tranĉo de la kuko 1-a AKVo, antaŭvide al la venontaj AKVo. Kvankam la kongreso ne konis imponan partoprenon de esperantistoj, kiel antaŭvidite, ĝi tamen disvolviĝis sukcese kaj atingis sian kulminon! Espereble, la sekvaj kongresoj de EVAA sukcesos allogi multe pli da kongresaninoj el ĉiuj partoj de la mondo.

Aktivado por la paco estas defio ne nur de viroj sed ankaŭ de virinoj; do ĉiuj virinoj leviĝu por la paco.

Joel Muhire, el D.R. Kongo

Pliaj informoj pri virina agado legeblas per la jenaj ligiloj:

<https://www.facebook.com/unuakongreso.devirino>
Grupo_ AKVo kaj EVAA

<https://www.messenger.com/t/1396944643738401>

Duolingo en Afriko

Nuntempe 700 mil homoj aktive lernas E-on per Duolingo, sed ekzistas potencialo por multaj aliaj, ĉar Duolingo estas la plej-granda virtuala lingvo-instruilo en la mondo, kun 300 milionoj da lernantoj.

UEA iĝis partnero de Duolingo por enkonduki lernantojn de Duolingo al la loka movado. Ĉiu e-isto povas iĝi Duolingo-ambasadoro kaj krei eventojn en tiu platformo. Kiam lernanto de via regiono atingas la finon de leciono, tiu vidos Duolingo-reklamon invitantan al via evento. En la mondo nun ekzistas 500 Duolingo-grupoj, el tiuj 60 (12%) en Esperanto.

Lernu kiel partopreni: <https://youtu.be/w8r1JaadL7w>. La alvoko estas ankaŭ por afrikanoj kaj afrikaj grupoj kaj kluboj.

Esperanto en Afriko numero 37

AKVo kaj lingva justeco

De la 21-a ĝis la 28-a de septembro 2018 okazis en Moramanga, Madagaskaro, la Unua Afrika Kongreso de Virinoj, organizita de la E-ista Virina Asocio en Afriko (EVAA).

La malfermo okazis la 21-an de septembro. Temas pri grava evento eĉ se la partoprenantaro ne estis impona. Vojaĝkostoj estas ja obstaklo por multaj esperantistinoj, ne nur en Afriko.

La nomo de la urbo Moramanga verŝajne elvokas nenion por multaj homoj. Tamen tiu nomo estas ligita al tragedia periodo de la franca koloniismo, kiu lasis doloregajn spurojn en la memoro de malagasanoj. Tie, kaj samtempe en Manakara, pli sude, komenciĝis insurekcio la 29-an de marto 1947 per atako kontraŭ la franca militista tendaro por forpeni armilojn. Sed en Moramanga la koloniaj trupoj, kiuj konsistis el senegalaj soldatoj, pafis vagonojn en kiuj estis 166 politikaj aktivuloj... tiel, afrikanoj pafis kontraŭ aliajn afrikanojn profite al la koloniistoj, kiuj vivis en indiferenteco pri la sorto kaj vivkondiĉoj de la loĝantaro. Ili kondukis kvazaŭ ili apartenus al supera raso. Ilia maljusta kaj malestima konduto de rabistoj vekis ribelemajn sentojn.

Ne estas interkonsento de historiistoj pri la nombro de mortintaj malagasanoj: ĉu 10 000, 30 000, 80 000, 100 000?... Inter la kialoj de morto estis ankaŭ elĉerpiĝo kaj malsato.

Finfine Madagaskaro akiris sian sendependecon la 26-an de junio 1960. Tamen tiu emancipiĝo ne forigis malfacilaĵojn.

Estas forta simbolo, eĉ se tiu elekto de loko ne estis intencita, en la fakto ke la Unua Afrika Kongreso de Virinoj okazas ĝuste en tiu urbo. Ni zorgu, ke tiu kongreso kreu la kondiĉojn de konsciiĝo pri la neceso de interŝanĝo de ideoj, informoj kaj spertoj surbaze de lingva justeco per Esperanto.

Henri Masson

Multfaceta agado por disvastigi Esperanton en Afriko okazas per donacoj al la konto Afriko. Por sendi monsubtenon al Afriko oni bv. plenigi la formularon ĉe: <https://uea.org/alighoj/donacoj/afriko>

Neformala amika renkontiĝo en la benina ĉefurbo

Sabate la 17-an de novembro 2018 okazis renkontiĝo en la kulturcentro JoCa en Kotonuo, Benino, pro la fakto, ke Mireille Grosjean, la prezidanto de ILEI, restadis tie dum kelkaj semajnoj. Ŝi invitis ĉiujn konatajn esperantistojn de la urbo. La informo rapide disvastiĝis kaj aliaj personoj esprimis la deziron veni; ili ĉiuj estis elkore akceptitaj. Preskaŭ dudeko da personoj ĉeestis.

Venis longdaŭraj movadanoj kiel Benoit Zinkpe, Francis Agbenou, kiu dum jaroj prizorgis la Afrikan Oficejon en Lokossa, kaj Karlo Alofa, iama kunordiganto de la Afrika Komisiono de UEA. Venis agemaj kaj konataj junuloj kiel Cyprien Guiya kaj Kingslim Edah, ambaŭ estraranoj de TEJO. Venis Athanase Eke el la Asocio de Terkultivistoj Esperantistaj (ATE), venis François Hounsounou de la Afrika Centro Mondcivitana, venis Joseph Tchokpodo kaj Gobi P. Abyssinie Ahonon.

Senkulpiĝis du personoj el Togolando, kiuj devis rezigni pri vojaĝo pro sanproblemoj. Same okazis kun Ezekiel Kede Gadj. Senkulpiĝis Mireille Hounkpe, kiu ne estis en Kotonuo en tiu tago. Ŝi sendis mesaĝon, kiun Cyprien laŭte legis. Senkulpiĝis Privas Tchikpe, kiu devis zorgi pri familia tasko aliloke. Venis du interesatoj, por kiuj la diskutoj komence okazis en la franca, kaj kiuj povis malkovri la lingvon per mallonga prelego de Mireille *Esperanto: jen prezento en la franca L'espéranto en vingt tableaux*.

Post reciproka prezentado, kiam ĉiu aŭdis pri la nomo kaj okupo de la aliaj, venis detalaj raportoj pri la Esperanta vivo de la plej aktivaj.

Kelkaj partoprenantoj



Kunvenintoj en privataj diskutoj

Cyprien jam estis trifoje en Eŭropo kaj rakontis pri sia lertigado kadre de TEJO. Karlo Alofa kaj Joseph Tchokpodo rakontis pri E-aktivado en la universitato. Benoit Zinkpe kiel sperta ledaĵisto prezentis sian deziron instrui kaj sian profesion kaj Esperanton al junuloj.

Pluraj personoj menciis la eblon mem financi lokajn agadojn. Mireille Grosjean prezentis la programon de ILEI, nome *Komuna Legado okaze de la Tago de la Libro* kaj ŝi laŭtlegis la tekston de 2018: temas pri bela poemo de Julián Hernández Ángulo el Kubo.

La fotiloj ne dormis... fotoj vidiĝas en la blogo <https://mirejo3.blogspot.com/2018/11/joca-kotonuo-nesto-de-esperantistoj.html>



De maldekstre: Edah K., Cyprien G. kaj François H.

Grava foto estas tiu de la tri beninanoj, kiuj estis kaj estas estraranoj de TEJO, la solaj el Afriko.

Mireille Grosjean

Por sendi kontribuojn al la redakcia teamo:



co2mm@frcuba.cu
adjevia@gmail.com

Por pli vigla faka agado

Estimataj,
En la estrara
kunsido de UEA,
kiu okazis en la 4-a
kaj 5-a de aŭg. 2018
post la 103-a UK en
Lisbono, la tasko pri
'Faka kaj Scienca
Agado' venis al miaj
ŝultroj.

Laŭ la Jarlibro
2018, ĉ.70 fakaj aso-
cioj (politikaj, religiaj, profesiaj, sciencaj, ŝatokupaj
kaj artaj) agadas en Esperantujo laŭ siaj karakteroj.

Jen mi prezentas mian planon por plifortigi
fakan agadon de UEA kaj petas vian bonvolan
kunagadon. Kun tri konkretaj celoj mi intencas
plenumi mian taskon.

Unue, Tutmondigi la agadon de fakaj asocioj.

Plejparte de la ĉ.70 listigitaj fakaj asocioj
estas gvidata ĉefe de eŭropaj esperantistoj. Por tut-
mondigi fakan agadon, nepre alikontinentanoj devas
aliĝi kaj kunagadi. Por tio mi proponas tutmondan
kampanjon, nome 'Membriĝ(ig)u al faka asocio!'

Due, Aktiva diskonigo de faka agado

Fakte ekzistas kaj moviĝas fakaj asocioj en
Esperantujo, sed ŝajnas al mi ke iliaj agadoj ne estas
diskonigitaj aktive. Vere tiaj fakaj eventoj povas
esti enhave tre altnivela kaj valoraj, sed ni malofte
informiĝas pri ili. Pli aktive diskonigante tiajn ag-
adojn tra socia medio ene de Esperantujo, paralele
ni tenu komunikadon kun asocio ekster Esperantujo.

Trie, Naskiĝo de nova faka asocio

Por envicigi esperantistojn al fakaj agadoj,
ni kreu novajn asociojn pri popularaj temoj... Tiel
oni havos pli da ŝancoj ĝui kaj praktiki Esperanton
kadre de propraj interesoj aŭ ŝatokupoj. Ju pli multe
da fakaj asocioj agados, des pli Esperanto-kulturo
riĉiĝos.

Mi volonte aŭskultos viajn afablajn pro-
ponojn kaj opiniojn por kunkrei pli viglan fakan
agadon. Se vi havas bonajn ideojn, bv. turni vin al
mia retadreso: leejungkee@khu.ac.kr.

Atendante vian eĥon, mi kore salutas.

LEE Jungkee
(estrarano de UEA pri
Faka kaj Scienca Agado)



DR Kongo en Vikipedio...


Oktobre 2018 en la
portalo Komunumo de
vikipedio aperis Demo-
kratia Respubliko Kongo
kiel Lando de la monato.
Tiel oni petis kontribui
per artikoloj, kiuj rilatas
al tiu lando! Bonvolu
kunlabori en plibonigo
aŭ kreado de artikoloj, kiuj rilatas al Kongo
(ĝiaj regionoj, urboj, lingvoj, biografioj ktp) per:
https://eo.wikipedia.org/wiki/Demokratia_Respubliko_Kongo



Por trovi pli da materialoj oni iru al la kategorio:
https://eo.wikipedia.org/wiki/Kategorio:Demokratia_Respubliko_Kongo
aŭ al la subkategorioj:
https://eo.wikipedia.org/wiki/Kategorio:Esperanto-movado_en_Demokratia_Respubliko_Kongo/;
[https://eo.wikipedia.org/wiki/Kategorio: Geografio_de_la_Demokratia_Respubliko_Kongo](https://eo.wikipedia.org/wiki/Kategorio:Geografio_de_la_Demokratia_Respubliko_Kongo)

.... Kaj afrikaj e-istoj sur kovrilpaĝoj...

Post sukcesaj internaciaj renkontiĝoj en
Madrido kaj Lisbono dum julio kaj aŭgusto
2018 la oficiala revuo *Internacia Pedagogia
Revuo* (IPR) de ILEI kaj tiu de UEA *Esperanto*
respektive ilustris siajn kovrilpaĝojn per fotoj
de afrikaj esperantistoj, nome la kantisto
Zhou-Mack Mafuila, kongano (nun loĝanta en
Francio), kaj Jérémie Sabiyumva de Burundo.



Renkontiĝo de gelernantoj kaj studentoj en Adohoun

Kiel planite, okazis diskutrondo en la urbo Adohoun, Benino, sabaton la 29-an de septembro 2018, en la konferenca salono de la urbo. Ĝin organizis membroj de la Benina Organizaĵo de Junaj Esperantistoj (BOJE) kun la celo informi pri Esperanto la gelernantojn kaj gestudentojn de Adohoun.

La disvolviĝo de la tuta aranĝo okazis sub la gvido de sinjoro Latifou Gbadamassi, prezidanto de la Asocio de Beninaj Esperantistoj (ABeE) kaj sinjoro Cyprien Guiya.

Nome de BOJE, mi dankas al la prelegintoj, al ĉiuj esperantistoj kaj al la ĉeestintoj, sen forgesi sinjoron Bernard Gnancadja, kiu ankaŭ partoprenis la eventon.



Foto de kelkaj partoprenintoj

Danke al ĉiuj, la celo de la renkontiĝo estis atingita: ni informis, disdonis informilojn kaj eĉ faris kursetojn al partoprenantoj pri la internacia lingvo Esperanto en gaja etoso.

Norbert Sadohoundé

Atestoj, raportetoj pri lokaj agadoj el la forumo ASUT

La klubo "Vivi Kun Esperanto" de Kodji, Benino, daŭre organizas siajn kursojn en la lernejo J. V.

**Bernard Gnancadja
(Benino)**

Nuntempe multaj gejunuloj kaj infanoj lernas Esperanton en Kongo danke al la senĉesa laboro de samideanoj, kiuj tute dediĉas sin al disvastigo de Esperanto malgraŭ manko de rimedoj.

Mi volas tute aparte esprimi mian dankemon al mia amiko Kwibe "Dankon", kiu senlace semas por la estonteco de nia lingvo en la regiono Sudkivuo.

Victor Correia (DR Kongo)

Mi translokiĝis al Bunagana, urbeto ĉe la limo kun Ugando, antaŭ semajnoj... En Bunagana mi jam sukcesis starigi klubon: "Bunagana E-Amikaro" kaj ĝus ricevis permeson instrui Esperanton tra loka radio, Mikenon Fm, du fojojn semajne!

Joel Muhire (DR Kongo)

Eĉ malgranda guto konstante frapante traboras la monton granitan. Por mi, disvastigi Esperanton estas plenumende mia tasko ĉiutaga.

**Espoir Ngoma Kasati
(DR Kongo)**

Esperanto en Afriko estas trimonata oficiala periodaĵo de la Afrika Komisiono de UEA pri la Esperanto-movado en Afriko.

Redaktantoj: Javier Ramos Nistal,
Adjévi Adjé.

Kion faras via landa asocio aŭ via loka E-klubo en via loĝloko? Bonvolu verki kaj sendi artikolon pri tio. La redakcio akceptas ankaŭ fotojn. Bonvenaj kompreneble estas ankaŭ sugestoj, konsiloj, komentoj por la plibonigo de la bulteno al: adjevia@gmail.com, co2mm@frcuba.cu.

Limdato por la numero 38: la 15-a de marto 2019.

Membroj de la Afrika Komisiono de UEA:

Kunordiganto: S-ro Emile N. Malanda, **Sud-Afriko**
Vickunordiganto: S-ro François Hounsounou, **Benino**
 S-ino Adeline Tony Umuton, **Ruando**
 S-ro Adjévi Adjé, **Togolando**
 S-ino Alexandrine Omba Tshamena, **DR Kongo**
 S-ro Assane Faye, **Senegalo**
 S-ro Alfred Arthur, **Ganao**
 S-ro Arlain Kizeyidioko, **DR Kongo**
 S-ro Doumegnon Koffi, **Togolando**
 S-ro Hassano Ntahonsigaye, **Burundo**

Pli da informoj pri la afrika movado haveblas per:
www.esperanto-afriko.org